

Стихиры Введения во храм на «Господи, воззвах», глас 1:

Да будут уши Твои // внимлюще гласу моления моего.

Днесь храм одушевленный святых славы / Христа Бога нашего, / едина в женах Благословенная Чистая, / приводится в храм законный жити во святых; / и радуются с Нею Иоаким и Анна духом, / и девственный лица Господеви поют, // псаломски воспевающе и чтуще Матерь Его.

Аще беззакония назриши, Господи, Господи, кто постоит? / /Яко у Тебе очищение есть.

Ты – пророков проповедание, / апостолов слава, и мучеников похвала, / и всех земнородных обновление, / Дево Мати Божия: / Тобою бо Богу примиримся. / Темже чтим Твое в храм Господень вхождение / и со Ангелом вси песенно, / радуйся, Тебе, Пречистая, вопием, // Твоими молитвами спасаемии.

Глас 4:

Имене ради Твоего потерпех Тя, Господи, потерпе душа моя в слово Твое, // упова душа моя на Господа.

Во святых святая, Святая и Непорочная, / Святым Духом вводится / и святым Ангелом питается, / сущи святейший храм Святаго Бога нашего, / всяческая освятившаго входом Ея // и обожившаго естество земных поплзшееся.

От стражи утренняя до ночи, от стражи утренняя, // да уповает Израиль на Господа.

Отроковицы, радуящиеся и свечи имущи, / Свечи днесь предходят разумней / и вводят Сию во святая святых священно, / проявляюще хотящую Зарю неизреченно из Нея возсияти // и просветити во тьме седящая неведения Духом.

Яко у Господа милость, и многое у Него избавление: // и Той избавит Израиля от всех беззаконий его.

Веселяся, прими, Захарие, / возопи, Анна всехвальная, / Юже проповедаша Божии пророцы Духом, / и Сию введи во святыи храм священно воспитатися, / яко да будет Владыки всех Божественный престол, // и палата, и одр, и светозарное обителище.

Слава, и ныне, глас 8:

По рождестве Твоем, Богоневесто Владычице, / пришла еси в храм Господень / воспитатися во святая святых яко освященна; / тогда и Гавриил послан бысть к Тебе, Всенепорочней, / пищу Тебе принося. / Небесная вся удивишася, / зряще Духа Святаго, в Тя всельшася. / Темже, Пречистая и Нескверная, / яже на Небеси и на земли славима, // Мати Божия, спаси род наш.